

民國上海縣志

鈕永建署



卷十五

人物上

人物下

卷十六

藝術

卷十七

游寓

民國上海縣志卷十五

人物上

| | | |
|-----|-----|----------------------------|
| 李邦黻 | 徐彭齡 | <small>從兄棟</small> |
| 曹允升 | 顧言 | |
| 李祖錫 | 王維勤 | |
| 王宗駿 | 嚴應鈞 | <small>祖正邦 父鳳岐 子兆椿</small> |
| 彭聲駿 | 周宗瑜 | |
| 喬錫增 | 潘上珍 | |
| 朱徵鎔 | 王宗毅 | |
| 劉世杰 | 劉汝曾 | |
| 朱承鼎 | 王宗驥 | |

上海縣志

卷十五

| | | |
|-----|-----|--------------------|
| 郁懷智 | 楊振錄 | |
| 張剛 | 張堅 | |
| 姚明燾 | 王維泰 | <small>弟維城</small> |
| 錢允利 | 丁熙咸 | |
| 朱耀祖 | 王慶平 | <small>子仁鏡</small> |
| 唐祖繩 | 汪錫增 | |
| 吳馨 | 劉至澤 | |
| 王宗暉 | 胡瑛 | |
| 耿光觀 | 鈕永昭 | |
| 蘇本炎 | 曹煒 | |
| 蔣清鏡 | 曹成達 | |

吳良謨

陳昌鳳

張之綱

趙淦

曹驥

吳鍾英

張國華

馬軼羣

陸耀庠

夏書林

黃海林 陳和生附

嚴克昌

沈澄清

李邦黻號梯雲晚取反身之義別字肩叟又字肩僧閔行鎮人林松同治

志有孫尚暉子續志少遭兵燹棄儒就賈北橋孫嘯琴一見器重謂儒

家子不當廢學遂決然捨去溫肄舊業從學於川沙顧孝廉謙之門同治八年入邑庠嘉善鍾文烝主講敬業書院邦黻從受業馭聞穀梁家緒論故於春秋學為最深邃成春秋穀梁經比事二卷輯唐玉

上海縣志

卷十五

一一

川子春秋摘微一卷采入南菁叢書復為輯述以發明之事母至孝以暇修供菽水居父母喪哀毀骨立竭誠盡禮喪服中讀禮欲綜貫古今為喪禮纂一書條理具而書未成常以為恨修林松易園詩文集板並刊易園集補遺星土釋鄉黨私塾課本及父母優盃羅室月來軒詩稿以承先志又呈送所著周易述補於王學使先謙得刊入續經解中家中舊藏書不以貧故鬻於人兢兢保守不使散失以為子孫當盡之責精於說文等韻學恪守三十六字母而以江氏永借韻轉切圖為入門要訣曾撰切韻啟蒙二卷及爾雅釋官釋親二卷中年後精研三禮尤好宋儒語錄躬行實踐治家整飭恪守朱氏柏廬家訓足跡不入公門邦黻治經遠紹易園家法近得鍾氏薪傳其教授生徒前後四十餘年教法會通經史歸本修身曾輯東萊博議

集評刊行爲學徒課本浦東西青年經邦黻講授皆蘄然不落恆蹊家素貧晚境稍裕族中無後及戚友困乏者量力資助以館穀之餘行慈善之實而自奉淡泊衣服或至補綴飲食恆不兼味居恆慎默然當酒酣耳熟縱談十數年來家國事輒蹙額深憂不能自遣晚歲以保存古學爲己任與同志設立圖書館課暇恆至館釐整藏書宣統元年邑人公舉孝廉方正固辭二年徵書至稱疾不赴民國元年冬卒年六十六邦黻勤於著述不自珍惜稿多散佚子味青檢遺書得文稿二卷雜稿一卷雜著一卷文宗桐城湘鄉詩有唐人風格

徐彭齡字允頤號曉秋允臨

見續志
藝術

從子彭齡事母孝撫弟櫟楨各成立

營鹽筴起家配運上南川引窩玉牒告成敍勞得鹽大使分浙江歷任仁和錢清下砂袁浦場官錢清最久錢清舊有書院廢圯久彭齡

上海縣志

卷十五

三

至卽命題觀風樓給膏火擇尤刊刻課藝壬寅癸卯兩科院生得甲乙榜者十七人爲從來未有之盛科舉廢學校興捐廉設小學七所又設宣講所閱報社爲各屬倡甯圍沙地坍而復漲原戶與墾戶互爭訟纏七十年官經數十任每辦清丈沙民揭竿暴動時人爲諺曰錢清好做甯圍難過彭齡抵任下鄉察訪者三年乃稟請設局升科親歷隴畝督吏丈量鄉父老各戒其子弟靜聽處分不半年而經界正巡撫張曾敷馮汝駉先後奏保彭齡熱誠興學卓著循聲籲請破格獎勵摺中言闔省寅僚能盡如該員之用心則學務無患不興地方無患不治兩奉硃諭傳旨嘉獎宣統中引退歸里民國元年卒彭齡從兄棟字爾權講黃老學壯游浙粵贛設帳授徒從游甚衆官江西候補知縣著述至富已刊者有老子詮釋求道津梁

曹允升字中孚世居江橋爲人急公好義若開浚河渠地方公益羣力所不及者均盡力助之曾任蒲淞市議員江橋新涇諸翟虹橋合併爲薄淞市奔走尤力民國二年卒年七十六

顧言字丹泉世居十六保荷巷橋性嚴重有膽識年十六畢羣經善屬文博覽古文辭尤喜讀漢書丹黃爛然咸豐十年洪楊擾松城言居鄉且耕且讀嘗舉徐光啓農政全書植棉成效勸勉鄉人以是種棉益衆（西南鄉四十餘圖荒墳絕戶地廢而糧額猶存皆由梱業賠墊同治六年言聯合士紳請於藩司王大經永遠禁止勒石縣署同治七年入邑庠）言於濬渠之學講求有素自光緒初至季年歷濬竹岡橫瀝千步涇俞塘并佐浚吳淞蒲肇諸幹水工至萬餘丈附近田數萬畝皆資灌溉橫瀝工竣知縣陸元鼎驗收河工謂曰如此鉅

工千夫雲集無爭毆口角片紙入告足見君之調度有方而用心良苦矣松滬通衢有中渡橋歲久頽廢言伙助勸募易木以石費至四千餘金鄰近橋梁有毀壞者悉修葺之光緒十二年至十六年歲連歉請於縣以積穀息金給籽種皆躬自規畫核實散放米貴則陳請平糶四境以安浦西各鄉向無書院同治十一年偕鈕世章張慶慈創辦吳會書院培養寒畯士風以振事載入續府志書院成鈕張故世言獨任其勞光緒二十四年以後國人競言維新乃改吳會爲強恕學校開四方風氣之先造就甚衆商約大臣呂海寰入奏傳旨嘉獎三十年邑人組織學務公所後奉部令改勸學所言被舉爲協理經理財政多所規畫邑人陸徵祥星使注重農業倡捐鉅金知縣汪懋琨屬言董其事規定辦法就閔行建農校延教師招學生不一載而成立三十

三年任總理官契局章程多歸手定宣統元年被選江蘇諮議局議員於本省利弊頗有建議言事親孝待弟友與人交篤於氣誼戚族有托孤者若馬橋鈕世慎同里沈作舟身沒子幼爲之處分家事以遺產寄交吳會書院管理及其子完姻悉以歸還鈕沈兩家至今感之精研醫藥自內經傷寒及劉張李朱近代王孟英諸書探討入微求診者無遠近必往治治輒效民國三年卒年七十餘

李祖錫字子蓮號祉聯世居閔行咸豐十年隨父榮棣伯榮滋

續志人物有傳

避地通州日手一編不以亂離廢學其後回里從師治舉子業尤篤信先儒義理之學事母孝母病劇焚香禱天割股和藥以進竟霍然愈又四年母卒哀毀骨立遂得怔忡病時愈時發同治十三年以縣試第一入泮撥入府庠尋補增廣生舉優行中光緒十一年副貢其爲

文一宗先正根柢經史尤善書取法晉唐在家授徒十六年館竹岡黃氏八年所造就甚衆遠近執贄來遊者皆擷芹食餼掇巍科以去熱心地方公益歲歉則請給籽種匪警則籌辦團防疏浚橫瀝淡水瀝母子涇改建啓秀雲路中渡橋經理普安衍善堂靡不竭盡心力實事求是而於公歛出納絲毫不苟二十四年政變後鑒於世界大勢非興學育才不可與顧言等改吳會書院爲強恕學堂並倡設務敏學堂延聘專家中西並課手定規制躬自督理以崇實黜華爲宗旨三十一年選授震澤縣訓導之任未久蘇紳延爲江震高等小學校長並由江震兩縣令會請稽察兩縣學務所過市鎮竭誠激勸一時間風興起捐資辦學者數十處猶慮偏重西文國學荒墜演述宋儒精蘊成修身範一本蘇湖學子爭相傳頌焉任職五年宣統二年

觀江甯勸業會陡患中風舌強言蹇適顧言出席諮議局邀治投以
熄風化痰諸品病漸瘳卽歸里辭退學官杜門養疴時本邑中等農
業學校成立邑令田寶榮敦請爲監督迫於地方義務扶病主持校
事任職七年舊疾復發卒年六十九著異文攬略二卷經義類編三
卷青琅詩文集隨筆等編待刊子三長子顯衡先卒次子顯常字鏡
海邑庠生性剛果明白事理因病習醫治人輒愈不受酬閔南輪船
公司與法商立興公司競爭勢幾不支顯常四出奔走竭力維持依
據條約與立興爭事始得直厥後立興歸併閔南航業始有起色三
子顯謨邑庠生肄業武備學堂暨日本士官學校歸國應試賞舉人
歷任軍職

王維勤字穀生慶勳

同治志列
人物傳

次子幼嗜學受經於鍾子英學文於童子

上海縣志

卷十五

六

佩避難劉河受拳術於太倉施蓮史洵遭寇亂不廢讀書時淺見者
謂今世已亂人可恣行維勤曰此正君子恐懼修省之時堯有九年
之水加一版者後沒湯有七年之旱施一勺者後枯若藉口世亂而
無所不爲乃詩所謂其何能淑載胥及溺者也清同治五年補行元
年壬戌歲試以第一名入邑庠尋丁父艱顧家中弟妹均幼遂絕意
仕進一以教養弟妹爲務維勤之學邃於經史其釋大學以誠正爲
根本格致爲入手其釋孟子以知言養氣爲亞聖根本之學其釋中
庸注意於君子之道造端夫婦而以中國胎教泰西衛生之說爲證
其釋書經注意於周公無逸常以國語敬姜論勞逸相提並論善談
易謂天道變化不主故常君子之出處語默所以能素位而行者在
大象六十四箇君子於諸史中惟取左傳史記次之爲歐陽公五代

史其他均視如帳簿無裨實用生平未嘗著書或勸以著作傳後曰
精理名言古人已先我言之在身體力行耳王氏以孝友起其家維
勤之教弟妹及子必舉其家先世孝友故事以爲準的承其教者莫
不感念祖德蘄然各能自樹立精醫理自內經傷寒金匱及劉張李
朱諸大家之書無不披覽嗜圍棋國手如陳子仙周小松與爲師友
弈理爲一方冠嘗曰善弈者能走逆境又曰劇戰時不可動忿兵蓋
就弈而悟哲理焉初維勤少時與無錫許靜山縱談天下事言欲致
治平宜廢科舉設學校行鄉舉里選之法而以時文帖括爲霸者牢
籠英雄之具時科舉方盛識者以爲知言宣統紀元邑人公舉孝廉
方正維勤曰歇後鄭五作宰相時事可知矣遂不應徵

王宗駿字適叔號沽生承基

續志
有傳

次子工算術善絲竹嫻崑曲畫法南

上海縣志

卷十五

七

田承基督辦甘黔皖統捐宗駿綜核收解款數百萬無毫釐誤以助
饟辦捐勞績歷敍員外郎分部郎中以知府用里居好施藥餌父承
基患半身不遂症嘗覓再造丸方請名醫加減躬自配製服之遂愈
乃出餘粒以行世承基建宗祠定祭禮纂家譜兄宗壽歷董積穀海
運宗駿襄助力尤多光緒二十年中東之役籌辦團練三十三年總
工程局成立任議董兼調查地方公產創辦內地電燈公司以抵制
租界之侵入宣統三年滬城光復組織保安團又輸款購洋龍設消
防團以弭火患宗駿富記憶力有忍耐力每任一事不苟不懈課子
綦嚴諸子科第繼起皆有聲庠序焉

嚴應鈞字秉國號殿卿先世自劉河徙上海遂占邑籍祖正邦少習油
麻業旣而自設肆晚乃營沙船業卒時年八十父鳳歧號羲棠幼時

習賈吳門動止異常兒肆主信任之及正邦設肆滬上招之歸肆主如失左右手內行誠摯與其弟恪守家業出入渤海遼瀋間皆守義重信爲衆商所推重其經商一軌於正義所不可雖逆億可獲鉅萬不爲也船號而外曾合股開設錢肆凡在戚鄰多所汲引俾之宣力商場久之聲譽漸隆邑吏以公家事相屬任十六舖巡防南局董事以河工案獎敘八品頂戴遇覃恩膺四品封典卒年八十一應鈞幼就傅卽勤敏端重比長理船業操奇計贏一出以信義貲甲一邑而自奉儉律已嚴待人謙和性惡訟犯而不校人有逋負不加迫索其在家庭能先意承志雖年逾五十猶孺子慕也父沒當道委爲十六舖巡防南局董事分所當盡皆力任不辭遇外省水旱籌振有求助者無不立應於鄉里義舉亦如之應鈞父子捐金襄助善舉皆隱名

不求人知不願獲獎總工程局成立被選爲議董宣統元年當道以董理清查公所事相敦促應鈞念時局日非風俗奢侈以年邁辭杜門却掃未嘗周旋其間同邑劉煥兩集江南耆碩爲千齡會應鈞與焉卒年八十二歿後數年其孫昌培以累代皆臻上壽且又齊眉偕老製三世耄耄圖一時名士題詠殆徧次子兆椿字頌芳附貢生早卒

彭聲駿字月亭塘灣鎮人監生性剛決有特識好義嫉邪而能容衆犯而不校故終身無一仇人光緒間兩次襄濬俞塘不憚勞怨撫姪如子清末出其自創產業均派子姪無歧視塘灣向無施棺惜字聲駿捐金爲之倡民國三年卒臨終猶以建立家祠設保嬰會兩事未成爲憾堅囑其子續成焉

周宗瑜字甲生馬橋人習醫師事松江金秉之治病別具神解宣統間各地籌辦自治宗瑜張之綱等主馬橋自爲一鄉不與閔行北橋合奔走甚力鄉自治成立再任鄉議長每屆會期先將議案細加研究蘄於法律人情毋相乖背遇事不可者必力持之不爲衆議所撓強恕學校始時款產頗不盡出本鄉宗瑜依自治章程謂校址在馬橋應歸本鄉管理歷呈縣省申請文凡十餘上再接再厲不稍衰其任事之勇如此民國三年卒

喬錫增字子卿世居北橋光緒末與朱洞賓創辦北橋公學宣統三年地方自治成立選任鄉董民有涉訟者輒爲勸導和解之嘗曰董理地方人民之代表也鄉曲不能無是非而是非無不可理喻旣爲和解不可留伏訟端必須使人徹底了解乃能和息以是鄉里多自願

上海縣志

卷十五

九

息訟民俗以和民國四年卒

潘上珍字茂昌世居新涇性孝友家貧棄讀就賈喜爲人排難解紛坦白無城府好施與發起施棺掩埋諸善舉力不足稱貸以濟之延師課族中子弟其貧乏者爲之婚娶庀材拓屋以居之襄浚吳淞江移建關帝廟廟有餘地釀貲購市屋數十間徵其租爲修理暨小學基金勸辦小學修建橋路蘇州航船傾覆竭力營救拯起十一人爲之易衣醫治各送之歸董新涇局事數十年任勞任怨人不敢干以私民國四年卒年八十九易簣時猶以不侵人利訓其子焉

朱徵鎔字吟香布政司理問氣量寬厚柔和忍耐每遇善舉盡心籌畫有公正稱光緒中董理普育堂務收養貧民凡一千數百人與李齡策辦魯晉秦隴等省賑務全活甚衆

王宗毅字垢生晚號鶴僧承堦續志第七子嗣伯父承樞後幼侍宦京

師從宋承庠御史遊喜臨池承庠亟賞之謂筆法爲諸昆冠年十五南歸受學於同邑曹樞兼習詩古文詞進步銳甚縣試第一入邑庠旋食廩餼學政札調入江陰南菁書院肄業南菁爲人文淵藪宗毅兼擅經解詞賦聲名藉甚中光緒二十三年選拔值胞伯承基以道光十七年選拔周甲六十年間先後同科士林傳爲佳話二十九年舉於鄉明年考取內閣中書充本衙門撰文三十一年學部設法政學堂考取肄業由部咨明本衙門例免入直並免扣資俸未及畢業同邑王慶平任兩浙鹽運使延充書記尺牘多出宗毅手慶平遷晉臬以道遠辭職家居宗毅精音律及崑曲邑人設潤鴻社推爲社長文廟樂舞任教習招集諸生按譜指授邑志續修任人物傳稿甫竣

上海縣志

卷十五

十

卒宗毅著述甚富多散佚卒後妻奚氏蒐遺稿屬慶平選定爲之序今有鶴寮遺稿

劉世杰字汝嘉邑優廩生邃於文尤擅詩詞著有默存詩稿少受經於李祖錫學有根柢祖錫長務敏公學世杰爲教員不辭勞勩後興辦淪智小學於邑北城繼復長市立養正學校三年規畫校務不遺餘力視學生如子弟學者咸樂就之民國五年卒世杰天資豪爽從事教育歷卅年其刪潤諸生課卷精力特健時下師範生莫能望其項背也

劉汝曾字省吾號景輿錫溫弟錫焜續志子幼歷從名師遊最後受學

於同邑曹樞業大進既冠入邑庠其始致力經史詞章壯歲大病幾殆經年始瘳遂絕意進取以熱忱任公益事歷董善堂祀典書院學

校河工團防皆實事求是區畫有方光緒二十八年邑令汪延董敬業學堂駐堂辦事任庶務兼任經學課在校清查校田四次監造校舍操場三次凡公產經汝曾管理者皆親歷丈繪圩號弓尺圖籍燦然最後經理慈善團棺塚手定日報月報年報各表式尤精密足資統計續修邑志任祠祀職官選舉列女各門分纂員稿將及半攫疾不起汝曾生平砥礪廉隅治事精詳不苟其卒也時論惜之

朱承鼎字理卿先世自南滙新場遷居閔行遂占邑籍補博士弟子員讀書終日不釋卷善屬文典麗有根柢尤好歧黃之學博通靈素難經傷寒金匱性敏而靜精研脈理治病輒應手愈不計酬求診者日數十起著傷寒述義四卷其規畫地方如辦團防設商會興學校籌自治濬河救荒諸章程皆其手訂便於實施歷任閔行鄉經董商會

上海縣志

卷十五

十一

會長處事和平詳慎人無異言

王宗驥字小鐵承錄

續志
有傳

子幼多病勤學不輟尤留心有用之學文不多作筆意簡古近桐城書宗魯公力透紙背然未嘗治制舉業手校家乘及寫定先德遺稿若干冊嘗摻先人金石印章輯爲紉佩齋印存以貽知交父承錄嗜硯石蓄良硯最多因以傳硯名齋撫摩手澤往往泣下性方剛戚屬子弟有片長獎借不去口有過輒面斥聲色俱厲與人談聲徹庭院治家嚴肅自奉儉約盛暑不科洗治事有定晷生平孝友有至性淡於榮利以助賑及海運功奏獎光祿寺署正選用同知加知府銜不謁選

郁懷智字屏翰自號素癡幼肄業廣方言館嗣以家貧棄學就商守信義重然諾中年以後營業漸順因以起家生平對於教育慈善事業

及其他公衆利益之事無不熱心興辦資助有差嘗創旦華學堂及普字義學七所先後輸資至壹萬壹千捌百元其補助各學凡十九校先後捐銀陸千玖百玖拾玖兩幣式千肆百元其捐助慈善凡二十一處先後捐銀式千式百柒拾伍兩幣式千壹百式拾元其他若施衣施銀施藥施棺施送善書等共計捐銀肆千捌百捌拾式兩幣柒百玖拾元其各省賑捐等共計銀壹萬零玖百玖拾柒兩幣壹千式百叁拾元其辦理公衆利益先後捐銀肆千玖百零柒兩幣陸千壹百餘元統計捐款共銀叁萬零陸拾壹兩幣式萬肆千伍百元懷智嘗提倡實業購桑秧千株分給法華引翔港二鄉農人勸令種植以廣蠶業並購美國棉子試種譯刊棉樹栽培新法棉種改良法培棉肥料淺說分送行世民國七年十二月卒邑人姚文枏等臚陳事

實呈請褒揚大總統褒以仁言利溥匾額及褒狀邑人爲立紀念碑於公共體育場懷智性孝友事親能得歡心有弟二懷恭懷儉幼時家中失火不得出懷智冒火掖之出始免於厄親既沒二弟尙稚懷智提攜扶植俾至成人常以私財潤其弟及二弟沒懷智復撫其子俾皆有以自立平日潛心王氏良知之學詩宗放翁有素癡老人遺集行世書臨顏米畫法雲林亦精鐵筆古趣盎然暮年商暇以藝蘭蒔竹爲消遣計其襟懷冲淡如此邑人私謚曰敦惠先生

楊振錄字偉才號味吟祖秋巖仁厚敏達精篆刻工繪事父聿修孳孳行善歷董善堂振錄幼岐嶷八歲讀唐人詩琅琅上口十歲始學爲詩文其師林孝廉曾望出聯語令對曰簷深上燈早卽應聲曰風定落花遲又曰深樹雲來鳥不知對曰空園露滴蟬先覺師激賞之年

十九入邑庠邑爲人文淵藪勝流雲集振錄恆與結社聯吟而族父德炳德鏞復督課綦嚴學業益進光緒十五年恩科登鄉薦再試禮部不售大挑二等授教職未及選除而政局變遷遂絕意進取家居教授十二年後就館於徐滙公學初任大修院教習繼兼中學教習能勤其職振錄少席豐厚晚年家中落而夷猶灑脫喜怒不形好吟咏蟄居一室當其冥思孤往輒發篋出唐賢詩高誦聲震戶牖仍有所得縱筆疾書自謂不減古人民國六年卒年五十六

張剛字子雍川沙九團人洪楊之亂遷居上海垂髫嗜學過目不忘爲業師所器重年十六應童子試十九入邑庠鄉闈八次屢薦不售肄業龍門書院治性理學新政迭興學校林立而南區獨付缺如於是籌集款項補助校費創立南區小學校見舊道德淪亡延請宿儒注

重國學遠近稱之歷辦南區學校十一年墊用千餘金同人擬爲設法籌還辭不受又擬請獎不允後入商界任醃臘業董十餘載潔已奉公銀錢一切毫不假手遇同業爭執事排難解紛不存偏袒衆心悅服交友以誠信治家以嚴肅一生謹慎力矯時趨民國七年八月卒年六十八

張堅字子方又字芷舫剛弟九歲就傅目數行下十三歲畢諸經作制舉文有奇氣府試第一旋入府庠肄業龍門書院光緒八年中本省副貢仍住書院與師友相切磋聞見益廣學業益邃素性淡泊有終焉之志十五年中順天鄉試舉人十六年成進士以知縣卽用籤分河南二十二年署新蔡縣初政卽矢明慎有疑獄必日夜思思不獲則微服訪察務使民無冤抑而後已書院月課鄉試實與常年積穀

恤孤養老靡不加意整理二十九年署固始縣縣境盜賊充斥堅下車嚴緝捕擇尤置重典比匝月盜風頓息有羅孝子者家貧親病不獲醫藥割肺葉和湯以進親病竟愈大吏以民德歸厚獎爲異政瀕行邑人上日烈風清匾額三十二年補武安縣縣僻處山谷風氣閉塞與山西直隸接壤宵小易竄伏又民俗嗜煙婦女亦漸染堅嚴治盜匪巡拔煙苗除之務盡時近收穫民環叩保留聲勢洶洶幾釀禍堅不爲少動曰吾爲百姓去毒雖死得所堅官汙積二十二年充鄉試同考官者三解京餉任軍裝局差任收發支應局差各一其充省垣高等學堂監督聘教員購儀器一手經營學風爲諸校冠辦學三年列上考保補缺後以知府用在武安行新政廢淫祀立工藝所勸辦煤礦創女學戒裹足農林畜牧樹之模範時籌款派捐堅擇其能

行者行之不能行者自負處分設法罷之居恆以勤儉二字自勸謂勤能補拙儉以養廉雖習見語未易及也任武安既久考績列優等宣統三年春以父士來年逾八十請終養假卸任歸里不與地方公事惟續修邑志任分纂每至午夜不息子其桐勸其節勞則曰吾生平宦遊近卅載未獲在梓鄉略盡義務今吾樂此不疲也民國年間邑人自武安歸述堅座右聯云在山泉清出山泉濁吾輩務一雪此恥師事三人兄事五人居官尙毋忘斯言聯爲宣統二年撰至今尙存署中云

姚明燾字孟筵元滋

續志有傳

孫文枏子幼勤學習論孟毛詩通喪服經傳

九章幾何代數又嘗受畫圖學法文臘丁文有手編手譯算學物理學等書手抄經傳說文及喪服書若干種入邑庠舉優行任敬業學

堂算學教員及其他學校十餘年民國元年任縣議會文牘員三年縣修志籌備處以學識優長夙負鄉望聘爲分纂員不就僅暫任書記員四年應族兄明德之招航海歷遼東黑龍江留省城兩月駐嫩江一年又應張慶桐之招任恰克圖公署主事兩年七年冬任阿爾泰財政局長八年三月七日昧爽衛兵變犯承化寺公署明燦出戶突中槍子卒年三十九明燦爲人謹厚精密無浮囂氣無苟且心歷練稍久僉以邊才相期到阿山僅百十五日不幸遇害而同邑同官之跳免者纍纍也事聞政府照文官因公罹險致死優卹

王維泰慶昌

續志
有傳

次子字柳生邑廩生僑居嘉定之南翔鎮性孝友嘗割股療母疾知帖括不足爲學清光緒二十二年就家祠餘屋設育材書塾三十二年任兵工學校校長嚴訂課程注重理化添建實習

上海縣志

卷十五

十五

工廠由是校務蒸蒸日上尤體卹地方清末當道擬加松屬各縣典業稅奔走甯蘇籲免事不獲行弟維城字匯生廩膳生工倚聲

錢允利字貴三宣統元年爲閘北商團副會長三年革命事起率團員維持秩序民國元年被舉閘北市政廳長二次革命時各國水兵借保護地方名闖入閘北界乃與工部局力爭事旋寢於閘北善舉救火會事盡力尤多

丁熙咸字賡堯別號慧齋府庠生爲敬業學堂教員光緒三十年九月巡撫端方咨送日本宏文學院習師範三十二年春畢業內渡仍回敬業兼任學監是年冬別組東城師範傳習所輔強女塾東明學堂自任校長不支俸給宣統元年夏登拔萃科明年朝考列三等就職直隸州州判三年軍諮府派赴庫倫充兵備處文案辦事大臣三多

聘兼幕職并命其子就學焉是年秋武昌兵起各省響應熙咸請假回京至則聞庫倫活佛宣告獨立訊亟取道津濟膠濟鐵路由青島乘輪回滬市政廳任爲市學務委員銳意興學民國元年春民政長吳馨任爲縣視學二年夏兼攝縣立第一高等小學校長擴學額爲六百人分教室十二組翻造前廳爲洋式樓房是年滬地遭二次革命兵燹之餘地方公益百端待理縣議會議組設特別會計處舉熙咸爲經理員吳馨委任之六年夏辭校長職專任公欸公產處經理員卽特別會計處於取消自治後變更名稱者也地方欸產教育款產積穀款產以一身任之其間收回也是園上海醫院推廣縣市鄉各校建築縣苗圃植樹場建造多稼里租屋百餘幢爲積穀增益歲人均悉心籌畫夙夜勤勞七年秋招商公學成立聘熙咸爲校長兼

任後南北奔馳心力交瘁發病卒

朱耀祖字曉春沙岡口人有膂力勇於任事興水利辦學堂及地方公益事與顧言夏其釗李祖錫相伯仲

王慶平字耜雲原籍諸暨幼失怙恃洪楊之亂避寇來滬依舅氏丁以居刻苦嚮學因入邑庠舉同治九年鄉試性風流倜儻治制舉文益有聲旣而累試禮部不售光緒十五年考取內閣中書十六年成進士改庶吉士年四十餘矣散館改主事籤掣禮部二十一年考取軍機章京每二日一輪值寅進午散或至未刻始退入直十餘年未嘗乞假每屬稿援筆立就同輩服其勤敏二十六年兩宮西狩慶平方退直聞警徒步出城詢駕行已遠倉皇前進顛踣者再飢就道傍市食夜假農家席地宿一晝夜行百十里以前途多盜折回貲棄略盡

得親友接濟復前進徑赴西安行在匝月始達入直行宮翌歲八月回鑾沿途駐蹕仍輪班入直駕抵鄭州奉旨補禮部儀制司員外郎抵順德派先期回京清釐檔卷二十八年充軍機處幫領班二十九年補精膳司郎中三十年充軍機處領班初慶平少時不矜細節通籍後一變而爲謹慎至是職司樞要益兢兢焉樞垣前輩語以居斯地位以閤淡聲華爲第一義慶平終身確守是言三十一年後官制改革軍機處改差爲缺領班秩同正三品三十三年授浙江鹽運使時詔清理財政簿書空積日不暇給竭半載之力一清積弊鹽斤甫加價商人請改錢碼爲洋碼大吏已爲所動慶平力拒之自涖浙任湖山咫尺未曾一游署以內未嘗更一器置一物書齋客室絕不增飾嘗謂朝廷設官爲辦事也稍縱游觀卽妨公務去浙時商人以明

鏡及澄水磁缸贈却之至今留置鹽務公所宣統元年授山西按察使晉省庶政刷新臬署祇一空屋新官到任所需悉出貲自備慶平喜曰向來州縣供應上司絲毫悉取之民我何忍乎勸視讞牘鞫審人犯必詳必慎尤注意州縣詳報命盜文牘有疑問輒馳札駁飭以爲俟至覆訊必拖延月日連累者多以是全活甚衆改提法使專辦司法行政事時審檢廳模範監獄同時成立部令製預算辦統計期限迫促前無師承昕夕督同幕佐辦理幸免延誤三年二月擢布政司更新伊始需欸日增學務司法巡警勸業各署設施進行皆仰給藩庫兼籌並顧至感困難尋奉旨護理巡撫時憲政亟進省庫告竭言利者猶挾策以進慶平專摺奏陳新政措施之失務以恤民力培國本爲請摺上交部議奏八月新撫陸鍾琦至回藩司任九月八日

晉垣民軍起戕巡撫直入藩署慶平恐被辱自縊以殉爲民軍解救擁之人諮議局監視逾月勺飲不入者三晝夜會民軍潰於娘子關晉省官紳請慶平出偕各司道散遣潰卒撫輯居民省城賴以復全旋奉旨開缺襍被入京一身外無長物旅京五年不問國事邑志續修公推總閱全稿始歸里僦居城南出入徒步見者忘其爲開府之尊也江南通志局聘任副纂束修所入賴以自贍卒年七十三慶平著述頗富遭亂散佚遺篋中惟日記數冊繕寫悉精楷至老不改間有吟詠亦載日記中子仁鏡字冰如三品蔭生順天府經歷工醫任京師外城官醫局最久先慶平卒

唐祖繩字蓮孫晚號夢幻入邑庠世居漕河涇鎮其初敦品礪行謹守繩墨事親以孝聞工帖括又熟於時務掌故之學辯論滔滔不絕下

上海縣志

卷十五

十八

筆千言立就早歲課徒鄉里門弟子稱盛科舉罷後橐筆出游歷主海上蘇報天津北洋官報大公報益世報筆政民國八年以積勞歿於津寓當益世報初辦時卽受聘爲總編纂員未及二載報紙銷數達數萬執北方報界牛耳館主西人加敬禮焉歿後三年仍以薪水之半贍養其家其見重如此祖繩所爲文不下數千篇多散佚僅存若干篇皆晚近所作其子敬熙屬同邑陳時夏爲之編次擬名其書曰夢幻遺著

汪錫增原名龍琛字季航人驥

續志
有傳

季子生於周浦周浦一名澧溪故

小字曰澧生母氏儲早歿錫增甫離襁褓人驥恆以父兼母職故父子之愛尤篤比長兩兄或以宦游外出獨錫增未離膝下依依孺慕終其身父子皆能文善飲應書院試同席咿唔推敲字句相商確如

朋友平居課畢往往徒步就鄰肆沽飲見者羨其天倫之樂錫增年十三受業於同邑趙晉棠十七入邑庠歲科試輒冠其曹遂食廩餼年未冠也興化劉熙載主講龍門書院選高材生入院肄業錫增與焉既而人驥亦補額住院人比之蔡九峯父子云光緒十一年中選貢出瑞安黃體芳之門明年朝考列三等就職直隸州州判父猶及見之二十八年中舉人嘗被聘爲海門師山書院山長主講二年辭歸時科舉將廢邑敬業書院改官立高等小學錫增任最高級教習其後學制屢變班級遞增而恆主任最高級以終其身凡十九年中間權養正敬業校長各半年任留雲校長十年仍未脫離敬業初人驥主講廣方言館錫增隨侍於天文地輿數理化涉獵有得不自以爲能顧生徒受業於錫增者僉謂先生以舊學發明新理新舊一貫

無不心悅而誠服教育事業俸薄而課重任此者往往半途輟業去錫增曰我生於斯長於斯生活於斯願終於斯其執德不遷如此方科舉時代門下士掇巍科入詞苑膺顯宦者相望其後歲時饋遺無所受謂我自食其力足免凍餒安用多金固以請則謝之曰鄙人所需於諸君者其在身後乎由是不敢復請其秉性廉介又如此邑志續修禮聘名宿分任纂輯人物一門最夥而城市尤多於四鄉錫增與王宗毅分任屬稿王認四鄉稿未竟而謝世錫增獨總其成勒成兩卷平時批改校課皆作小行楷一筆不苟有與論文者終日娓娓無倦容至欣賞處爲浮白擊節生平無愠色無惡言晚年患鼻聾不辦薰蕕嘗自笑曰近來觸處腥羶令人作嘔予猶得久耐此惡空氣賴有此耳民國九年六月酷熱攫微疾卒

吳馨字畹九號懷疚其先歎人清初以避兵遷上海遂著籍焉馨八歲而孤母楊本生母張延師課讀賦稟特優弱冠入邑庠卽棄舉子業究心有用之學南洋公學設師範院馨奮起就學於教授管理諸端研究有得三載卒業因設務本女塾爲全國女學校創就學者衆北至內外蒙古南至南洋羣島莫不有務本女生蹤跡焉光緒三十一年城廂總工程局開辦被選爲議董於地方利弊興革知無不言言無不盡旋任西區區長任事五載獨注意道路警察衛生諸要政而於盧家灣河道方斜路界綫及電車電綫與外商竭力交涉挽救地方利權尤多諸凡築路濬河計畫遠到事詳上海市自治志宣統二年被選爲縣視學兼勸學所總董任事一載是歲又被選爲城自治議長任事二年逮革命事起被推爲縣民政長後奉令改稱知事自

任縣職起宣統三年秋末迄民國三年春初其間時局震動變幻萬端馨從容應付一無所紕解組後任法租界公董局華董磋商劃界主權所在絲毫必爭五年被選爲教育會會長按期召集各小學校校長教員研究教育孜孜不倦同時舉辦公共體育場首捐巨貲爲倡卒底於成卽任爲管理指導員兼童子軍聯合會會長手訂規程他邑取則七年春任勸學所所長推廣全邑小學教育定按畝帶徵學費辦法以補原有教育經費之不足於西區闢馬路於九畝地闢商市於城壕基關電軌於斜橋築公共體育場又測繪全境輿圖續修冊年志乘成績昭彰清末以捐資助賑歷獎道銜入民國以維持地方秩序獎五等文虎章復以設立務本女塾捐歸縣立女子中學特獎一等嘉祥章三等嘉禾章頒給興賢毓秀扁額其於全縣學務

全縣水利具有擘畫計慮績密顧未及實施而卒論者惜之

劉至澤字愷之至喜

續志有傳

弟監生浙江候補府照磨補用知縣歷榷浙

江松陽江蘇常海釐稅每戒其巡丁曰釐金本稗政苟足比較何忍重苦吾民以是商販稱頌之僑寓松江爲雲間九老之一民國九年卒年七十二

王宗暉字日卿承基

續志有傳

從姪嗣父承禧精計然術宗暉席其緒始習

錢業繼習布業往返營口牛莊以土布易油餅頗獲利斥其餘充善舉修理街道興捐義塾惠及孤貧嘗爲人雪冤償債口不言功戚屬十餘家生前養恤身後喪葬之事全力任之四十年無少懈

胡瑛

譜名大柯

字執卿原籍婺源以經商日久占籍本邑性孝友其兄年老失業時贍其家並育其孫自置良田千畝設胡氏敦睦義莊於本邑

上海縣志

卷十五

二十一

陸家浜以田屬之同族推主徽甯思恭堂事辦理善舉不遺餘力

耿光觀字邨雨先世徽州以經商至馬橋遂入籍焉從鈕翰

見府縣續志

鈕永

譽華亭陳鎔經童召南治經史詩古文詞制義補博士弟子員性慷慨勇於任事與王珍

見續志

鈕永昭等董濬俞塘彳于河干督勸不懈

清光緒末協助潁北馬閔巡防局員嚴禁煙賭犯者封屋充公雖親戚好友不稍假借人服其無私其後聚賭售煙者輒避私室光觀密知之乃偕十齡幼女偵查得實送之官藉以示儆由是煙賭絕跡光緒三十年間與蔣清鏡張謙受等創辦馬橋小學校強華女學校敦聘良師按戶勸導故生徒甚衆其後馬橋小學校歸併強恕強華於宣統三年由鄉董接管改名萃秀卽今之鄉立第四學校也光觀狀貌魁梧聲若洪鐘平生好周人之急好飲酒酒酣後與父言慈與子

言孝間及地方掌故史乘娓娓不倦其內行修飭事母孝晚年猶孺慕不衰

鈕永昭字復生號挹暉世章

見續志

次子祖元蒸爲一鄉耆宿晚年以課

孫爲樂永昭及其兄永保幼承庭訓家學淵源弱冠入邑庠憤吾國之日趨貧弱慨然以興學校辦實業爲已任于是俞塘公學成立於前廣利蠶桑公會勸辦於後闢桑田數十畝植桑樹數千株選地方志士肄業浙江之蠶學館學既成實行育蠶爲地方倡導一時聞風繼起者頗不乏人乃同志識見膚淺心志不堅稍受挫折遂爾氣餒荏苒三年一蹶不振永昭氣忿成疾抑鬱以終永昭性情嚴峻不苟言笑肄業江陰南菁學院著有晏子春秋校釋二卷博瞻精覈多發前人所未發選刊南菁叢書中生平所學經史而外兼通醫易星緯

上海縣志

卷十五

一十二

諸書而尤精于生辰推算之術或有以張之洞陶模岑春萱三制軍之生辰八字試其術者永昭決其富貴生死不爽累黍嘗督浚俞塘不肖之徒有以土方多寡相矇者永昭略事勾稽立摘其奸時人驚爲神焉

蘇本炎字筠尚升

續志有傳

孫父鮫叔紹柄另傳咸善書本炎能承家學

其商學受業於曾鑄

續志有傳

鑄器之妻以女本炎精法律凡商界章程

公牘及析券合劑莫不明習力謀破除吾國商業積習性豪爽議論縱橫動中肯綮見義勇爲提倡實業踴躍投貲綜其生平爲會長者四爲董事者六初於光緒三十年創辦民立中學屬其弟本鈔任校長助經費數萬又創辦民立幼童學校屬其妻曾澤新任校長又助其妹創辦民立女子中學五四運動之後見學生動輒罷課頗不謂

然謂青年際此時艱益宜盡力求學以備他日用若違家長之命以輟學業非計也本炎自奉甚約子女皆布衣徒步不染時習民國八年卒年四十八葬蒲淞市中新涇

曹煒字芝文邑庠生事母至孝母歿設座二十年虔誠供奉里有服毒者持藥往救雖隆冬深夜必赴不受酬見貧者傾囊助之任崇正官塾教習及文廟樂舞教習屆祭期必重整琴瑟校正音律任洒掃局節孝採訪事悉心記載襄理江蘇海運十五年始終不懈董復善堂及醫藥牛痘惜字施棺慈善事業次第舉辦不支車馬費著幹事齋文集試帖詩嘗印送醫藥堪輿諸書其中推拿保赤必要一書尤爲醫家推許晚年研究釋道諸經典嘗爲修訂重刊民國十年卒年七

十三
兄城穀見
志選舉表

上海縣志

卷十五

一十三

蔣清鏡字冰卿馬橋鄉人邑庠生髫齡卽不喜弄謹守繩墨恂恂如長者從鈕翰續志治經史翰卒與翰之子璈及嚴家鼎遊以道義文章相切磋璈字奏雲亦諸生資稟過人風神散曠未冠卽以詩文蜚聲文社間校訂羣書怡然自得有高世之志其詩冲夷恬靜入陶靖節堂奧文近葉水心詞學稼軒楷法玉局松雪隸則張遷韓勅慕林和靖之風因號梅影詞人所畫墨梅老幹杈枒著花的歷有致性耿介不諧俗而內行修潔清鏡旣日與漸摩學業猛晉後又從鈕永保童召南治制藝皆得其心法性不輕去就應聘授徒賓主輒相得甚歡館華陽橋顧氏至十餘年旋任馬橋強恕沙溪縣立農業閔行強敏各學校校長教員造就甚多鄉間推爲祭酒有大著作多仰成焉每放假旋里後生踵門執經問難者相繼清鏡指示詳明雖盛暑嚴寒

曾不屏却曰我樂此不爲疲也家貧而廉於取亦不肯有求於人少時同學如鈕永建朱孔文金慶章或縮兵符或佩法篆或膺外交重任偶有書翰往還一無所干與耿光觀張益謙等勸辦強華女學校馬橋小學校並盡義務爲之教授其古文蒼老簡潔行書得聖教序筆意晚年東游日本考察教育以資取法其後三子盡喪遭遇坎坷民國十年卒

曹成達字豫材鍾坤

續志藝
術有傳

子弱冠入邑庠屢試不售橐筆出游湘鄉李興銳重其才延攬入製造局先後筦庫房及議價處事盡心擘畫謀所以節費飭工之法昕夕勿懈蘇省勸辦鐵路上海舉辦市政襄理總局事務遇事皆盡心力以才器重於時天性敦篤五歲失母事父暨繼母皆得其歡心教養二弟成勛成猷孜孜不倦以孝友聞晚年

上海縣志

卷十五

一十四

以子汝霖官外務部左侍郎誥封光祿大夫就養京師生平自奉極約而饋貧周急無恡惜遇荒歉輒盡力賑濟嘗謂士大夫旣得溫飽當念小民困苦民國十一年卒年六十七臨終自輓曰念一身無過無功地獄天堂問閻羅何以處我溯先世克勤克儉朝乾夕惕願子孫毋忝所生

吳良謨字虞臣閔行人性仁厚自奉儉而好行善經商以信義爲重遇口角爭訟苦口勸息人感其誠稱之爲佛久任普安堂董事多所建設中年乏子晚歲有六子皆以爲爲善之報卒年七十餘

陳昌鳳字采苞閔行人入邑庠畢業師範歷充鄉校農校及城市養正學堂教員後任勸學員學務委員實心任事籌畫周詳民國十一年卒年五十昌鳳誠謹儉約有古君子風後以積勞病歿士論惜之

張之綱字韻笙馬橋五七圖人慶慈續志有傳族子入邑庠後設館授徒事

母至孝宣統二年各地籌備自治時馬橋有主聯合顛橋北橋馬橋閔行爲一鎮者之綱主馬橋獨爲一鄉與王廷奎周宗瑜等呈准於省縣鄉議會成立被選爲鄉董旋任縣議員改革時與商會辦理保衛團徹夜梭巡宵小匿跡後習法政執行律師業務遇事不苟辦理事件輒曰訟則終凶盍事排解人咸稱爲長者民國十一年九月清丈籌備會推舉審查員審查清丈章程十月審查員十二人公推之綱爲審查會長悉心討論修正清丈規程製成說明書及出入經費概算書錄送籌備會人咸服其精細

趙淦字鑑湖世居邑城幼避紅巾亂寓法華性至孝母氏徐病劇仰天籲禱刲臂肉煎湯以飲之竟愈事聞大總統題褒至性過人額諸親

上海縣志

卷十五

一十五

友聳愚開筵慶賀淦曰不可命子錫恩以筵資移作興學用就幼時避難之法華鎮購地初立小學校名曰思本

曹驥號潤甫八歲入西人所設蒙塾習中西文同治初入英界工部局任譯務十年入邑庠時在庠文生兼通中西文者惟驥一人嘗著英文字入門行世華人之爲英字典自驥始光緒初知縣莫祥芝聘任縣署譯務關道劉瑞芬檄辦洋務局繙譯又委考查美國回華學生九年關道邵友濂檄赴川南崇實四縣商辦漁團並保護大東北公司海綫十年總督曾國荃檄辦行轅密電邵友濂檄充兩江營務處委員十一年劉瑞芬出使英法奏調隨員至印度洋因病折回十二年曾國荃檄委襄辦金陵洋務局兼辦下關稽查局暨同文館西學教習十九年金陵臺灣督撫均委令駐滬坐探軍務驥辦理外交先後

二十餘年遇會丈會審會議一秉至公毫無偏私捕房遇華人犯罪者罰充苦工驥謂有傷國體嚴厲交涉始得罷免中法戰事起法軍窺鎮海在滬覓領港西人已有成議驥炯知之密設法阻止浙東幸免兵災歷任保安堂棲流公所和安學校董事總工程局教育會縣議會議員而於閘北二圖義塚與英工部局力爭訂約永遠保存時論尤韙之曹氏宗祠祭田耗蝕殆盡驥悉心經理籌墊用款歷四十年訪尋先墓跋涉吳縣嘉定諸鄉著尋墓記及曹氏鄉賢錄曹氏家集目錄輯高伯祖錫寶古雪齋文集曾叔祖江西陞雜詠父耀璨琅軒詩稿諸書次第刊行驥事母孝與人交淡而彌篤存卹戚族自奉至儉嗜讀中西學說各有心得嘗刊封禁海口論孝經儒行合編其他新聞譯稿刊於製造局者又十餘種民國十二年壽八十邑人正

擬臚陳事實呈請大府舉鄉飲賓遽於六月卒長子鍾麟邑庠生先卒

吳鍾英字汲深閔行人秉性孝友慎言行嚴取與苦志篤學入邑庠補增生清宣統初詔舉孝廉方正與邑人李邦黻王維勤同被舉獨鍾英入都待試適武昌兵起卽南旋杜門課徒平生維持國學以四書五經先正語錄諄諄訓勉獎掖後進恆如不及公推爲普安堂總董添殯舍置義塚擴充接嬰保赤名額嚴訂寄柩年限及建橋鋪路修埠無不竭盡心力撙節開支晚好吟詠與奉賢朱家駒青浦徐公修相酬唱著有觀樂吟草民國十二年卒

張國華字達卿顓橋鄉人嫻習婚喪禮數鄉里有事輒爲襄助里人感之嘗勸立顓橋學堂貧苦就學者免費歷任恒善堂經理顓橋鄉議

事會議長教育會會長及清丈籌備委員盡瘁桑梓三十餘年性沈敏孝友母病侍奉不稍離夜必仰天禱祝及歿哀毀成疾民國十二年卒

馬軼羣字杏生彭家渡人名醫馬雲亭子入邑庠補增生性靜默讀書過目不忘不涉外事於農業教育提倡尤力

陸耀庠號鼎卿清附貢生候選訓導歷任崇正東南官塾及南官塾教習勤於授課晨七時前到塾六時後退學者咸宗仰之繼任文廟樂舞教習辦祭董事改革後保文廟保管員被舉爲洒掃局收支員爲人誠懇篤實絲毫不苟對於地方公益及族黨事尤盡力爲之有古君子風焉

夏書林果育堂救火社社員民國元年以救紅欄杆橋許姓災灼傷兩

上海縣志

卷十五

二十七

股死江蘇都督程德全獎給能禦大災額二年死舊校場災者九舖衆安社社員黃海林江蘇民政長獎給舍身成仁額九年死救舊倉路災者四區救火會會員陳和生縣知事沈寶昌獎給捨身赴義護軍使盧永祥獎給舍身取義額

嚴克昌字哲人居馬橋鄉世爲望族敏而好學弱冠入邑庠嗣又與當世名人遊研究詩賦掌故之學好集成語以爲文才名頗著旋以屢躋鄉闈退求醫學暇以詩文自娛年五十卒臨卒自挽云人生五十二不爲夭死得恰好家富三千儘受用喫贖有餘

沈澄清字志青號培生馬橋一二圖人家世業農澄清獨喜讀書肄業強恕學校旋入邑庠肄業師範學校研究教育洋涇楊保恆最器重之清光緒間與張之綱周宗瑜王廷奎等籌辦本鄉自治被選爲議

長旋勸學所聘爲單級小學宣講員周歷各市鄉竭誠指導未幾就
湖南常德師範學校教員先後任職十餘年民國十二年病卒著述
多涉教育其規畫本鄉教育事宜不遺餘力云
人物下

葉佳棠

趙履福

子承慤

孫文詒

唐錫瑞

弟尊璋

子祖釗

趙世修

蔣慶和

謝源深

楊保恆

王全綱

陳桂春

蘇紹柄

黃協塤

秦錫圭

徐鳳標

上海縣志

卷十五

二十八

姜雲洲

楊德鏢

陸文麓

李鍾珏

林曾裕

沈秉春

唐祖瀛

倪清漣

劉志濤

金文字

顧慶邦

陸 鑫

潘 鎬

奚佐湯

補遺

董 含

喬佳佑

黃 琮

鈕永譽

唐樹滋

謝文彬

陳增鈞 弟增源 姪錡

周之楨

康濟

朱以義 子洞賓

沈壽昌

朱占春 子孔慈

楊繩祖

楊忠

周錦棠

曹日新 子鍾潞

瞿永嘉 子慶同

金士林

沈士偁

張滌

陶德懋

張楨 子光豫

陸桂棠

趙雲秀 孫本善

葉佳棠字棣華和 見續志 三子少習商業善算術姑夫沈澄煜署浙江新

昌縣篆後筦烏鎮南潯衢州後林諸釐局皆延司會計出納不苟同

上海縣志

卷十五

二十九

邑王維圻總湖州嘉興鹽釐局禮聘殷勤待為上客又為甲商經理鹽廩先餘姚後劉河商竈交頌游浙凡四十年不營私事不薦一人故去留交代之際恆脫然無累及離引改章潔身引退年七十矣天性仁慈事父及兩兄生則孝友歿則經紀後事必誠必信既歸里精力猶健邑人推董普育堂經畫周至老癯殘廢各得其所又以餘力創立震修學堂延聘名師成績冠諸校即今縣立第二小學也民國三年卒年八十二

趙履福字志熙號子禧颺曾 見續志 子為文簡鍊每試輒冠其曹遊庠食

餼肄業龍門書院與姚文枏項文瑞遊致力於漢宋之學遠近聞其名爭委贄焉三林學校成掌教務嚴訂課程士風丕變民國三年任本鄉經董其時私立小學經費多絀別移鄉歛維持之地方公益事

業躬自董理不辭勞瘁兩次疏濬三林塘任勞任怨口不言功以是鄉里德之年七十一卒弟子私諡曰和恪先生子承慤號鶴琴諸生光緒三十二年由三林學堂貲遣游學日本瀕行與同志秦之望陳師咸從兄承家等發起筠溪小學專收蒙童及初等男女同校欲增進社會程度熱心籌設規畫初定即束裝東去民國二年夏畢業於東京高等工業學校應用化學科歸國後任浦東中學化學教員承慤承父履福之教學有淵源秉性忠厚勇於自試賈志以終

孫文詒號燕秋父士錫慷慨好施與性尤純孝文詒生而歧嶷性復豪邁明達時務甲午中日戰爭戊戌政變庚字拳禍前後各上萬言書皆洞中機要光緒十七年舉人二十年進士以知縣用歷充通運局發審兼總監兌浙江學務處總文案兼總稽核歷署浙江奉化臨海

上海縣志

卷十五

二十

等縣知縣授鎮海知縣兼營務處提調鎮海縣教諭在任時勅設學校舉辦警察及平民習藝所開地方風氣之先吏民歌功頌德所至有聲宣統三年因疾乞休杜門養疴絕意仕進民國成立後浙江都督湯壽潛江蘇民政總長李鍾珏迭次徵召皆以疾辭不赴著有八琅仙館文集紅珠館詩詞集劫紅綠等書卒年六十二

唐錫瑞字子衡心柏

續志
有傳

長子事親純孝善堪輿醫學能丈量田畝松

江育嬰堂有南滙沙田一萬六千餘畝上海清節堂有嘉定縣田二千餘畝錫瑞按戶清丈造冊繪圖堂中得有稽考同治四年秋浙藩應寶時函聘襄辦工賑歷辦浙西河工並海甯州備塘河工工長一百二十里逐日乘馬河干日夜督催如期工竣四鄉橋樑有圯壞者募款修建行旅稱便募建劉沈二公祠及馬孝女祠光緒三十二年

米價奇昂申請地方當道禁米出口保留積穀民食以紓又龍華子藥廠存儲火藥逾時過久慮有不測力請遷移當道韙其言卒將廢藥傾棄地方稱慶平時掩骼埋胔遇善必爲著有唐氏四禮輯要二卷二十六保保志四卷卒年八十三弟尊璋字詠茗晚號難齋心柏四子遊幕京師及粵蜀滇黔閩晉所至有聲光緒十九年猱猱倡亂雲貴總督王文韶敍功以知縣用銓分河南晚年歸里與邑人士詩酒唱和討論地方利弊以漕河涇至徐家滙道路崎狹倡議關漕溪路以利行人著有難雜鈔二卷筆錄十八種松江唐氏入泮錄一卷卒年七十一子祖釗字企周入府庠博通經史及門成就甚衆

趙世修字韻丞世爲邑中望族六世祖文哲高祖秉淵曾祖祖模祖繼

勳同治志並有傳

俱以文章道義傳誦於時繼勳官泰興教諭因家焉世修生

上海縣志

卷十五

三十一

長泰興同治十三年入邑庠旋食廩餼肄業南菁書院與青浦張家鎮松江張葆元最友善爲文沈博絕麗得江山雄直之氣歲科試輒冠儕偶顧屢躋鄉闈鬱鬱不得志抑塞磊落之氣恆流露於詩泊辛亥國變橐筆走燕京爲五城中學講師課藝之暇縱情詩酒慷慨悲歌不能自己嘗語同郡友人謂吾死必瘞吾於陶然亭畔樹短碣曰上海詩人趙世修之墓與香冢爲鄰於願畢矣願頷數年歿於雲間會館卒葬於廣渠門外雲間會館義地所著有話雨集稿已佚今傳世者有澤畔吟感艷集二種乃集中之一部分也

蔣慶和字靜園鷺竇河人性慷爽有膽識談吐風生好爲人排難解紛凡錢債糾葛土地爭執之事經其勸導咸帖然感悔光緒中浚橫瀝與顧言李祖錫等往返任事依限竣工歷浚淡水河千步涇寒暑奔

走口不言勞跨橫瀝之啓秀橋向支以木年久失修勢將傾圮募資易以洋檀護以鐵欄行人稱便民國五年卒年七十八

謝源深字志澄號西山父錫祉字香谷精醫術喜施予遇貧病率不取酬壽八十有二源深賦性聰慧讀書過目成誦年十一畢十三經作詩文有奇氣光緒十三年入邑庠有志於經世之學旁及金石書畫評隲允當不屑以帖括爲事二十年中舉人逆知時局日危文字不足以濟變決計不應會試專致力於鄉里公益三十一年秋海潮爲災土塘冲决日夜奔馳身任修築之役工竣謀善後始議設塘工局顧地方款絀不獲已恆捐私資助成之浦左一帶廠棧林立洋商地痞朋比爲奸侵漁田畝矇領道契糾紛無所不至源深力持正義不屈不撓卒使就範又創道南小學規畫周詳成就甚衆宣統二年當

選諮議局議員於地方利弊建議侃侃率具綱領民國成立杜門却掃不問世事平居深自韜晦不欲以名自見然遇鄉里爭議咸引一言爲重時論高之有隱君子風焉民國九年卒年五十二

楊保恆字月如洋涇區之社莊廟人弱冠補附生長於小學時在清光緒季年朝野競倡變法與邑人賈豐臻等東渡日本畢業弘文學院回國後於二十二舖創設小學校一所旋以龍門書院改爲師範學校又籌設速成師範及單級教授所等一時學者雲集社會知名之士皆出其門民國元年任省立第一師範校長擘劃周詳推爲教育界先進嗣就上海城市自治公所學務專員上海縣學務課長教育部教科書審查等職往來京蘇間對於本鄉教育勵精竭慮不憚煩勞洋涇各學校多於此時成立民國四年應教育部聘編纂教科書

在北京旅次覆軍不及施救民國五年歿於協和醫院年四十四教育界咸痛惜不置焉

王全綱字有常原籍鎮江其父避洪楊之難僑寓縣城遂家焉家本寒素而力學勿輟弱冠入邑庠南匯奚氏素號望族度其必貴妻以女資以膏火全綱益奮發遂登鄉榜成進士授翰林院編修散館以知縣用分發廣東歷任花縣海豐增城樂昌海陽等縣知縣俱有政聲數爲廣東鄉試同考官得士稱盛性狷介恥干求亘二十年未嘗升擢坦如也光緒中同邑李鍾珏知廣東遂溪縣事廉幹有聲於時以爭廣州灣事遂知花縣不久解綬虧欠至鉅上僚追比甚嚴適全綱繼其任爲李百端彌補藉免賠累復貸以資斧始得歸里時人兩賢之生平邃於性理之學是非曲直不稍假借遇事衡情度理侃侃直

道引經據典滔滔不絕聞者爲之動容中年研求歧黃之術入其堂奧雖未嘗懸壺而回春妙手譽滿一時晚年明心見性尤多澈悟易簣前數夕自謂夢至一山殿閣庭陞森嚴整肅其中一殿榜曰古天民藪旁懸一聯上聯有理境關鴻濛人樞超象外之句語極玄奧文亦冗長或謂全綱生有自來死有所歸而其生平所學與聯語相關惜傳者未能憶其全文爲憾耳

陳桂春爛泥渡人以駁運起家性慈善於地方公益事業盡力攸助孜孜不倦光復之際地方警餉無着幾致譁變桂春臨時籌墊得以無事又於警局路私立小學一所年捐經費千餘金縣長沈寶昌嘉其好義贈以見義勇爲額所居曰穎川小築布置嫺雅有隱士風卒年

蘇紹柄字稼秋邑庠生性至孝友敦篤伉儷耽詩酒擅書法夫人王元珠女士同邑王記屏四女性淑婉工詩善畫著有婉春遺稿紹柄在家課徒遇事外出夫人輒代督課自是生徒歲增戚族子弟咸來就讀光緒二年就閩商聘董理蘇垣泉漳兩館事洪楊之後毀廢不堪悉心整理有條不紊光緒七年湖北學使高勉之聘襄學幕光緒十三年董理上海建汀會館事光緒十九年渡臺灣襄理製造局報銷兼稽核中日事起始復歸里夫人早逝紹柄日以詩酒遣懷又任蘇州商會副會長辦事公正人咸欽之迨齊盧構兵避難來滬因迭受驚恐勞頓益甚病匝月而卒年七十四

黃協埴字式權號夢畹家本川沙高行鎮以川沙分屬上海遂占上海籍性穎敏童時母程氏授以詩卽琅琅上口從南匯張嘯山遊詩文

上海縣志

卷十五

三十四

益進入邑庠時新聞事業惟申報開創最先英人美查聞其名聘任主筆每日著論發揮名大噪銷路驟增自是主筆政二十年申報遂執新聞界之牛耳光緒三十三年就震旦學校學監宣統二年改就南匯第三公學校長南匯續修縣志任分纂員輯有海曲詩續鈔十二卷同聲集二卷癸甲記遊詩一卷民國十三年卒年七十二

秦錫圭字鎮國號介侯晚號見齋榮光

續志有傳

次子幼慧能文光緒十九

年登鄉舉二十一年成進士授翰林院庶吉士二十四年散館改官知縣選山西壽陽縣知縣二十五年履任壽當道衝地瘠徭繁民多溺女錫圭嚴禁之復籌設保嬰局貧民生孩月給錢米弊俗漸革二十六年直隸拳匪起錫圭懼其蔓延清查戶口嚴禁客店容留匪類乃邑西榆次拳匪突入邑境殺教民焚教堂急請省兵駐縣獲匪首

正法匪遂駭散會京津失守兩宮西狩勤王之師絡繹於道邑故有清徭局錫圭命徧設分局儲備芻糧平價發售分檄各鄉舉辦民團扼守險要復募壯丁一百名朝夕訓練督往四鄉巡查客軍咸斂手奉法紀二十七年聯軍入晉境州縣悉聞風遁潰兵西下沿途搶掠孟縣測石驛之驛馬被劫一空於是公文往來不能轉遞巡撫岑春煊檄探東路軍情錫圭命練勇若干人分懷公文徒步越孟縣平定州直入直隸獲鹿訪察軍事而次第陳報未幾獲劫馬匪數名訊實正法梟示驛門馬仍歸驛驛路始通岑撫嘉其處置有方命兼全省營務處乃召集各軍將領令收集潰卒分守要塞各軍咸懾服旋坐教案落職遣戍淳州陝甘總督升允聞其才聘入幕府命主文案兼督練公所文案土藥稅捐局文案官銀錢局坐辦振務局坐辦和輯

商民遠近悅服宣統三年山西巡撫丁寶銓專奏昭雪得旨開復原官民國二年江蘇省議會選爲國會參議院議員即自誓不入政界不受黨派津貼及其他非法取得之金錢三年袁世凱停止參衆兩院職務五年黎黃陂召集國會六年張勳迫黃陂解散國會兩院議員赴廣東開非常會議七年開正式會議八年開制憲會議錫圭皆出席與議十一年黃陂復職恢復國會仍到京出席給三等嘉禾章十二年給二等大綬嘉禾章十三年卒年六十一著有補晉執行表二卷方鎮表二卷宣景文三王年譜一卷見齋詩文集受川公牘各若干卷

徐鳳標聞北徐家宅人小名阿根充海昌公所扛夫父名德升已故平時事母至孝天性敦篤雖業扛夫遇貧者即路遠不索厚酬人咸重

之民國十四年四月

舊歷三月二十五日

夜十一時家失火鳳標從睡夢中驚起

徧喚隣人取水灌救倉猝間各自奔逃迨鳳標覓母不得知尚未出險急返身入救其母其妻隨夫同入火穴救母其時火已燎原屋梁遽折母子夫婦三人同時罹難至翌日檢出屍骸徐孝子仰面死四體筋絡被火燻炙拳曲如蝦衣髮俱盡卒時年三十五歲其母徐倪氏年六十二歲及妻徐徐氏年三十六歲皆焦頭爛額側身而死由檢察廳派員蒞驗後在海昌公所募棺殮之棺值價三十八元移葬於大場南白皮橋其父徐德升墓側子名執中年十四歲曾在和安學校讀書弟名根生年二十七歲業工

姜雲洲原名東海姜家宅人父賢良初業鞋匠家貧不能令子入學賢良爲廚夫令雲洲爲魚販魚行多在吳淞雲洲往返淞滬日行百里

上海縣志

卷十五

三十六

積錢買米以養老母偶市麵食其蓋麵魚肉必留歸奉母昏定晨省無間寒暑所入既微恆不能舉火乃請於父設一宰牛作初時營業不振力持不怠二十年後始稍發展於是力行善事調卹貧苦施給衣米凡稱貸者零星數悉不署券亦不計還自陳家巷至姜家宅一帶曾獨資建築石路往來稱便十五年夏滬上大疫遂致不起卒年五十六

楊德鏞字仲琪號耀珊邑廩生城書曾孫

見同治志

立瀚子

見續志

光緒五年經

魁十五年進士即用知縣任三臺縣知縣代理潼川府知府十七年任四川鄉試同考官歷辦滇黔永岸綦岸鹽局事務丁父憂回籍川民遮道攀留服闋選授廣西博白縣知縣以親老告近改選安徽涇縣知縣勤恤民隱政聲卓著因病辭職歸涇民籲留一如川中自退

官後家居養母世事概不與聞民國十六年卒年七十五
陸文麓字崧侯清附貢生待人和藹見義勇爲迭任保安善堂及棲流公所董事凡矜老恤貧收養流民諸事履行勿懈有某董私售義塚地於外人一再力爭卒得保全棲流公所地瀕吳淞江戶口日盛而學塾極少光緒三十二年創立和安小學延聘名師分科授課越二十年而學額達千六百餘人復於公所設工藝廠教以織布旁及木工革工成績甚著民國元年七月上海市政廳選舉總董文麓當選任事之後清理市債百廢具舉三年自治取銷惟學務劃交縣署縣長洪錫範令姚紳文枏任市經董而以文麓副之設市經董辦事處接管學務五年文枏辭職文麓任經董市立小學歲有增加整頓學欸不遺餘力初任時僅四千圓越十年增至四萬圓六年東亞同文

書院在龍華百步橋租用民地建築艇房文麓以地在軍事區域內不容溷雜外人呈請當道嚴重交涉卒以廢約齊盧戰爭後官辦市政復歸民辦乃就市公所名譽董事兼上海縣修志局纂修員上海市徵訪局主任清丈局及商會董事法租界公董局華董等職遇事一秉至公不肯稍事遷就凡所規畫一以便民爲主至其躬行實踐事親孝與人忠事寡嫂以敬撫孤姪以慈亦爲人所難能云民國十六年卒年七十二

李鍾珏字平書晚號且頑父炳銓寶山縣諸生以孝行稱精醫鍾珏早孤警敏殊常兒遭寇亂遷上海年十七入邑庠肄業龍門書院丁祖母程氏憂乃棄舉業專究經世之學兼應字林滬報館主筆感城河淤塞飲料不潔每遇火災取水不便建議開自來水廠先就城北設

局引水入城居民稱便光緒十一年選優貢朝考以知縣用籤分廣東迭署保甲洋務局清理南海積案等差擢署陸豐新甯遂溪縣事所至有聲其風節政蹟最著者在令遂溪縣時先是法人索遂溪吳川兩縣地及碇洲東海兩島居民呼籲保全議久不決光緒二十四年冬鍾珏視事後即調集團兵實施訓練親往校閱勸以大義法兵攻黃略村各團聞警麇集法兵見勢盛始退復調兵艦三艘駐赤嵌勢甚汹汹廷派廣西提督蘇元春議和而法兵復攻麻章墟發砲擊民房傷團練九人居民三人轉攻平石有軍官二人被團兵擒獲戮之法兵大憤拘雷瓊道周炳勛要索備至復大舉攻黃略村練勇死六十人傷三四十人焚民房數百間縣城大震各地團練皆來聽指揮遂收復黃略村未幾得蘇提督電告止兵復邀同往會勘界址謝

勿往是時法人以二軍官死電駐京法使要求以遂溪縣令抵命形勢嚴重中外大吏以三次交綏皆法爲戎首交相論辨於是粵督密電交卸回省遂溪居民詞頌送別香花塞途其後蘇提督議定遂溪界址至赤嵌福建村爲止麻章黃略皆獲保全居民感激不止時李文忠鴻章新簡粵督周道炳勛入謁訴稱職道受辱皆由李令妄爲所致文忠訶之曰天下州縣皆如李鍾珏洋人敢要中國土地耶時人聞其語電促謁文忠卒不往以是節概聲譽當世高之光緒二十六年張文達公之洞檄調赴鄂歷辦文案及武備學堂洎文達移督兩江即委充江南機器製造局提調就局後餘地立初級小學設醫學會及女子中西醫學堂經理擘畫布置秩然視事之暇議於城廂南市仿行警察設立總工程局試辦地方自治拆城以興商務惟拆

城之舉邑中守舊者尼之乃折衷採闢門築路之議光緒三十二年就總工程局總董改辦電燈廠爲商辦電燈有限公司推廣警政分設東南西三區三十三年奉令禁煙限期迫促業此者數千人咸汹懼乃召滬學會商餘學會商學補習會滬西體操會南市商業體操會團員聯合五會爲商團公會擔任保衛晝夜梭巡地方始獲安謐先是城廂內外救火會三十餘社各自爲政遇警喧攘動致債事於是集合組織成救火聯合會建築鐘樓互施援助城廂內外之救火事業始收聯絡互助之效他如創設中國品物陳列所上海醫院收回內地自來水公司改組城自治公所皆其勳烈之卓卓可紀者革命事起民黨領袖與地方士紳咸引鍾珏一言爲重乃博諮衆議密謀應付而處處以保全地方勿傷民命爲要義故東南光復匕鬯不

驚事定後首拆城垣築電車軌道移城西義塚地建設慈善機關於是貧民習藝所新普育堂南市電車公司閘北水電廠次第成立民國元年南北和議告成興革善後之事次第結束遂絕意政治游心於金石文藝其間雖勉徇地方紳士之請一就市政廳保衛團長非其志也既見黨國鬭爭時事每况愈下乃屏跡崑山取舊藏書畫檢點評隲其鑒賞之精迥非時下諸人所企及自編平泉書屋目錄二冊流傳域外收藏之富衡鑒之公海內外咸歎服不置云民國十六年卒年七十六邑人私諡曰通敏先生

林曾裕字問之別號依谷炳魁

見續志

子邑諸生爲人誠懇曾任涵德中

學校校長兼養正飛虹小學校教員循循善誘勤於督課並任保衛團董事教育行政委員民國成立文廟學官廢止學田祭器無入主

持經地方士紳申請縣署延聘曾裕爲保管員負責保管主辦春秋上丁釋奠十五年奉省長委爲文廟奉祀官十六年卒年七十三沈秉春洋涇人居其昌棧南業銅匠民國十三年浦東保衛團成立秉春即加入爲會員十六年夏鹹塘附近遇盜保衛團聞訊追捕盜自東竄西適經秉春家南時方浴罷閒坐聞槍聲自遠而近知爲逸盜乃告家人曰我當截盜去路其妻阻之秉春日身爲保衛團員有盜不捕焉用保衛爲遂執棍伏路旁盜過急起擊之盜亂發手鎗適中要害立時殞命年僅二十三遠近哀之其葬處人稱沈烈士墓云唐祖瀛字步洲漕河涇人入邑庠性聰穎善書法生平儉約任鄉議事會議長旋董鄉事節存公款三千餘元以一千元爲濟滄會基本金凡本鄉年老者無依者給牌按月領費以二千餘元籌設鄉立第三

學校修建橋樑行善不倦

倪清漣字士清洋涇區之四十八圖人性慈善對於地方公益事宜莫不量力贊助任新聞報館總會計歷二十年在鄉私立育新小學一所教導貧苦子弟成就甚多卒年五十九

劉志濤字頡雲洋涇人生而穎異韶齡能屬文年十五即應試旋補附生歲科試輒冠全軍於是補增補廩並舉優行癸卯舉於鄉倡設寶仁小學於洋涇東鎮是爲東鄉設校之始由是而震修而蒙養等校相繼開辦清季籌備地方自治議合高行陸行塘橋洋涇四鄉爲一鎮名東涇公選志濤爲總董辛亥光復之際警餉無着秩序大亂時居蒙養小學聞警出而制止警士恃衆頑抗欲加暴行志濤大呼曰苟不傷害地方余當負責籌給衆咸諾之乃邀集地方人士分頭籌

措如期給與紛爭始息民國成立後頒布市鄉制度仍爲洋涇市總董凡屬市鄉行政事宜如教育衛生工程農工商務及保衛團慈善事業等莫不酌量情形次第施行爲人和藹可親凡所交無貴賤貧富一致待遇人咸德之其家嘗遭失竊價逾千金案破追贓賊已典質用罄警官詣商辦法志濤語之曰彼既窮而竊竊仍不能免其窮既窮則辦之何益倘知改過釋之可也其德量如此時年六十六金文宇以字行金家巷人自幼穎悟未弱冠補附生任教職於中法學校十餘年迨法領事公署聘任文案始辭教職民國以來自治成立被選爲洋涇市議長議長例有津貼車資文宇絲毫不受時人以是高之卒年五十七

顧慶邦字燕庭漕河涇人性至孝父晚年病瘵臥牀七載慶邦雖操商

上海縣志

卷十五

四十一

業每日準時返家侍奉七年如一日其至性足稱焉

陸鑫字虎丞洋涇人卒業於上海師範傳習所能詩工書曾爲洋涇市副議長後任市立第一小學校校長募款建築新舍規模略備其一
生心力盡瘁於教育界者十之八九可以風矣卒年五十有三

潘鎬字景周洋涇人附生父夢花爲塾師景周幼時督課綦嚴專習史學習字昕夕不輟故景周眇一目而偏工八法者父之教也科舉廢後南洋公學考取官費出洋學生景周已獲選卒因目眇而罷聞者惜之後往蘇州法政學校肄業任洋涇勵學會國文主講民國後又任市公所文牘等職績學致病費志以終卒年四十五

奚佐湯字真杰馬橋鎮人少通經史大義旋遊童樹棠先生之門學益大進入邑庠清政不綱知帖括未足致用與顧言鈕永建黃蘊深金

慶章諸人募資勸辦強恕學校又以鄉村蒙童失學者衆復釀資設正蒙小學民國初年地方不靖創辦鄉團悉心保衛鄉里德之於地方興革事宜殫力規劃勞怨勿辭以捐資興學辦理四鄉農會有功獎給三等嘉禾章生平秉性忠直勤儉自持族中貧乏無告者時加周恤並建宗祠置義莊田百餘畝爲基金其敦睦族足以風焉卒年六十四

人物補遺

董含字閻石一字榕城幼時明敏年十五補邑庠發憤勤讀晝夜不休順治十一年舉人十八年進士殿試時主試擬置第一忌者尼之置二甲第二遭移藩之變絕意仕進遨遊山水蕭然自得晚年耽心經史手不釋卷所著有古樂府二卷閔離草四卷間居稿三卷北渚草

上海縣志

卷十五

四十二

二卷林史一卷山遊草二卷三岡識略十卷一名尊鄉贅筆盍簪感

逝錄二卷安蔬堂詩稿十卷

並見華亭縣志

喬佳佑字芳虞世居北橋佳佑性孝早年失恃故自號莪村事父尤篤父卒哀毀終制後家貲雖裕自奉仍儉尤肯周急難歲稔輸粟以賑全活多人郡邑官師屢欲薦孝義舉鄉飲皆力謝之學使諸城劉旌其門曰年高德劭邑令以壽奏旌賜八品冠服並給粟帛卒年九十四內閣中書舍人浙江山西主考官陸錫熊誌其墓刑部員外郎中書舍人曹錫寶書其銘

黃琮原名琳字昆發號二鄉閔行人邑庠生嗜酒好書嘗遊青浦王昶之門與李林松鈕春船諸人友善博觀羣書喜作擘窠大字額其屋曰卷石山房亭榭竹石布置翛然著有頤素齋詩稿乃金剛經註釋

一卷

鈕永譽字詠仙有逸才同治五年以院試第一入邑庠詩文清麗書法東坡間參魯公爲藝林所珍重與同邑顧言華亭郭福衡友善過從甚密爲道義之交著有晚香書屋詩草

唐樹滋號子怡

晚年更號志伊

世居漕河涇鄉好學工詩年二十五入邑庠屢試秋闈薦而不售研究醫理診治輒驗同光間奉檄兩浚吳淞江復浚漕河涇諸港里中善舉襄助甚多人有過失規勸備至性仁厚無厲色惡聲至其遇公正發憤洋洋數千言若江河之奔決人咸服之襄建宗祠助祭田修族譜以附貢生保巡檢肅清捻匪案內保花翎五品銜淡於榮利不求仕進光緒二十九年卒年六十

謝文彬字子穀性義俠勇於任事咸豐十年粵匪犯境縣城危急知縣

上海縣志

卷十五

四十三

劉郇膏檄各鄉團練保境文彬率團勇禦之匪遂退繼辦松江營務同治元年隨淮軍克復嘉定辦理江浙湖廣轉運米石事宜以功保知縣分發江西歷任安仁都昌各縣知縣都昌民情獷悍號稱難治蒞任後查獲首犯懲治之餘俱帖服并革除陋規創設書院士風爲之不變地方要政如治水務農積穀備荒相繼舉辦離任之日耆民遮道攀留愛戴備至省中當道器其才歷委充饒州德化鄱陽康山秀江景德鎮左蠡上饒貴溪吳城吉安建昌各地釐差均以廉敏著稱勤政恤商口碑載道至有謝菩薩之稱素性儉約布衣蔬食若將終身在贛數十年未嘗挈眷自隨故於去世之日行李蕭條士紳有爲之泣下者光緒三十一年卒於建昌差次年六十八著有聽泉吟稿三卷太上感應篇靈驗記一卷聽訟心得一卷

陳增鈞字佑申承父業沙船賴以生活者恆在三百人以上生平任俠好義凡遇水旱偏災地方公益事靡役不與光緒八年山西大饑輸銀五千兩光緒二十年黃河告灾輸銀叁千兩皆匿名捐助世莫知之光緒十年中法之役欽差大臣左宗棠南洋大臣曾國荃會檄委辦後路糧台悉心擘劃絕無隕越事竣由軍功保至同知直隸州上峯器重爭相羅致以侍養嗣母終未出山光緒三十四年卒年五十有六弟增源字藻春世業商至增源更業轉運往返滬津營口間性伉爽質直有沙船遭洋舶撞折後舷船梢損失甚鉅迭向索賠不允反以行駛不慎責難事聞巡道龔照瑗知咎在洋商力助交涉卒獲賠償增源以公理既伸取得賠款悉充善舉於籌餉籌賑案內保獎四品銜兵部員外郎卒年六十光緒三十一年給樂善好施額准予

建坊增源子錡字稷堂附貢生由國史館謄錄議敘鹽大使嗣奏保免選本班以知縣分省補用光緒三十一年投效奉天將軍趙爾巽奏留任承德縣幫審未及半載結案三百數十起大吏嘉其能保補缺後以直隸州知州升用加四品銜在奉省辦農事試驗場成績斐然尋以病歸里卒

周之楨字子儼邑庠生居三林鄉康龐宅爲制藝文不事修飾自中繩墨生平悃悞無華館滬市十餘年布衣布履不改常度其授徒勤於講解學生最易領會曾設帳於邑城徐氏及後辭歸徐氏子有泣下者著周氏家乘秦榮光爲之序

康濟字愷侯富於天才工詩能文獎掖後進尤爲熱心嘗授徒三十保四圖謝家巷有留別陸懷民詩云萍蹤偶爾寄鄉村看罷煙霞卽閉

門藉有士衡邀過會話殘紅日對清樽其詩清雋典雅大都類此惜遺稿散佚見者不多

朱以義字武園北橋人爲人有至性好讀書博聞強識不事舉子業所著詩古文辭斐然可觀尤精於醫非親故不輕診視其教誨子弟一以躬行實踐爲歸故朱氏世爲邑中望族胥其教也子洞賓字步雲邑庠生十餘歲而孤事母孝苦志求學從華亭歲貢陳醉六游文名甚噪待人謙恭自持勤謹後棄舉子業攻醫有名於時

沈壽昌字清和洋涇市人幼聰穎有大志年十二選入上海出洋總局肄業成績優異選派出洋至挪威大學校專習理化時清廷初創海軍需才孔亟光緒七年奉調回華由北洋大臣李鴻章派在威遠艦實習旋任二副以定遠有功擢把總十二年升濟遠巡艦大副十五

上海縣志

卷十五

四十五

年升署北洋海軍中軍左營都司尋又升任幫帶時壽昌在海軍防次常以書勉胞弟福昌林昌儲才以爲國用二十年六月朝鮮變起日本先派海軍絕我通朝鮮海道時北洋大臣命濟遠威遠廣乙三艦翼運陸軍至牙山事爲日本偵知襲擊三艦於豐島海面濟遠管帶見敵近匿甲板厚處獨壽昌屹立司舵并指揮礮手還擊不幸舵毀壽昌中彈歿年祇三十有二清廷嘉其忠勇追贈總兵銜妻周氏有賢聲恆勸夫以國事爲重因夫久役在外竟至無後兩弟賴其策進均有聲鄉里云

朱占春字嶺梅三林塘人博聞強記有智略遇事敢爲好爲人營解不平同治季年淮軍駐龍華恣肆不法鄉民誤爲賊殺之吏拘某甲拷掠某甲已屈伏論律當死甲父馳赴占春乞援救占春索閱全案文

卷歎曰冤哉是獄甲供以挺擊而兵屍身首異處有是理乎以狀聞卒得平反其精察類如此時寇警日蹙當道議於王家渡築砲台禦之民多震恐占春上書言十不便得中止洪楊亂後所在多盜賊首先辦鄉團晝夜警備地方以安其他保衛鄉里之事靡不竭心力爲之因是忤當道旨欲借事陷之遂徙居高墟隱於醫著推拿二十八法行世卒年七十三子孔慈字志超承家學業醫性至孝父病臍剖股和藥以進泊沒哀毀備至生平豪俠好義扶弱鋤暴爲常人所不能爲某日嘗斷炊從質庫得金歸過其鄰聞詬誶聲詢之知爲鄰家喪子惑巫言欲以喪事陷同居者孔慈排闥入反覆開道兩造成折服遂傾質金殮之爭議遂息歸家未能舉火處之夷然其隱德足以風焉中年妻亡誓不再娶逾二十八年卒年七十

楊繩祖號子明漕河涇人入邑庠性厚重寡言與人交情意周浹讀書聰慧有經世志事親謹順父患外症半年迎醫煎藥朝夕侍奉及歿喪葬盡禮撫兩弟成立財無私蓄同治間知縣莫祥芝延講闔邑鄉約歷任邑令咸稱其品端行方爲一鄉仰望云

楊忠號子恬附貢生世居漕河涇鄉十五圖咸豐八年襄浚漕河涇并南新涇諸港洪楊之亂知縣劉郇膏委辦團練越境剿賊克復泗涇北幹山松江府案內保舉候選訓導及全省肅清保賞戴藍翎加六品銜同治二年襄浚吳淞江改捐縣丞分發浙江試用並以河工保補缺後以知縣用加五品銜光緒十四年復浚漕河涇新涇等港忠性情靜默遇事明斷凡地方公務梓里細事宣力排解父老重之周錦棠號省園九歲喪父母育於祖母黃氏家既長習賈遭亂避地法

華又避周浦族之孤苦無依者輒招之同處事祖母至孝祖母戒殺生錦棠能承其志祖母有疾侍奉湯藥衣不解帶及歿哀毀骨立嘗讀李密陳情表至臣無祖母四語輒三復流涕自念遭家孤苦遇戚里之孤寡者必量力攸助家居西門舊時自孔家術至紅欄杆橋道路泥濘天雨積潦無宣洩之處行者病之錦棠醵金詣果育堂請築路開溝光緒十四年路成行者便之光緒二十六年卒臨終指牀側簾出逋券悉焚之

曹日新字作邦號子懷邑庠生垂燦七世孫榮嗣子耀翔子也

垂燦榮耀翔均見前

志爲人誠懇樸實和藹可親任崇正南官塾教習三十餘年誨人不倦官塾中子弟之遊庠者以南塾爲最多董洒掃局事逢釋奠期終日駐局歷久不懈日新子鍾潞號少懷府庠生伉爽質直遇事不苟

上海縣志

卷十五

四十七

父歿後繼任南官塾教習晨七時授課至五六時放學終日嚴督生徒雖祁寒盛暑亦不輟課六官塾會課南塾生徒前列者居多

瞿永嘉字竹亭號樂君監生初以通判分省浙江辦理海運有功累保同知光緒三年題補馬鎮同知八年委辦海運局九年檄調代理津局海運事旋返原職見地方風俗衰敗倡育嬰禁溺女並革生剝羊皮之習刊串雅方書印送陰隲文等善書十九年冬歿於任所子慶同字仲成甫八歲扶櫬歸里述及父病况聲淚交并聞者咸爲感動歸後肄業尙賢堂震旦復旦諸校羣學會之設任教育籌款建設諸務又以餘力擔任愛國城東體操諸女校及吳淞小學花業公學染業學教科藜苓紫金校長類盡義務宣統二年間襄查九畝地公產民國元年知事吳馨委規畫城壕路工旋被選爲上海市議會議員

二年二次革命戰罷兵災善後事宜以積勞卒年甫二十有八
金士林字谷園世居江橋邑庠生多才善楷著綠滿廬文集光緒末創
辦江橋陳渡曹渡小學任江橋局董暨江橋區學董光緒三十四年
卒年三十九

沈士偁字乘遠號樸庵邑庠生性孝以父母年邁授徒奉養工詩著有
缶音集耆餘集

張滌字味莼工隸書善吟詠秉性敦篤終身不娶居陳忠愍公祠之東
偏室奉父母粟主有時果必供之而後食出必告反必面至老無倦
容

陶德懋字蔭喬性明決果毅未弱冠卽董二十二保事辦理河工積穀
等公廉精覈清咸豐三年與邑紳趙枏等請濬都台浦十年知縣劉

上海縣志

卷十五

四十八

郇膏復使董濬以洪楊軍擾中止捐貲辦民團劉郇膏使會閔行張
江柵團禦賊於南橋地方賴以安全

張楨字子勛浦東人廩膳生與兄桂賃居法華西鎮兄弟相繼任法華
局施賑浚河實心任事循循善誘教誨不倦與馮純壽續志有傳爲密友

子光豫字鏡秋邑庠生畢業師範任敬業學堂教員勤於課業張氏
世善書家蓄古碑碣至富光豫之曾伯祖嘉仁著隸辨補五卷自序
稱遺者拾之缺者增之康熙戊戌以後出土之石爲南原所未見者
輯而續之手自寫定紙墨黝然遺蹟可珍也

陸桂棠字菊生明陸深裔孫咸豐十年髮賊犯邑境時桂棠年十六卽
投效江南提標右營以智慮明敏翌年選派隨同洋員教習學習鎗
炮陣法同治元年隨營防剿克復嘉定縣城並北新涇四江口兩次

解圍二年調赴浙江委帶開花炮隊轉戰杭州餘杭海甯桐鄉富陽等處皆捷浙省肅清奉命解散四年投効銘軍奉委幫帶洋炮副營續委管帶洋炮後營克復黃陂等縣自入伍至此以功歷保都司賞戴花翎八年船政大臣沈葆楨招往福州委派模廠等差船工告成晉階游擊光緒三年福州大水時桂棠方統全福右營練兵率領士卒徒跣拯溺晝夜無間獲全者甚衆閩督何瑾嘉其功委署龍巖營游擊補臺灣恆春營游擊署嘉義營參將調漳州鎮標中營游擊其後復奉委管帶福銳左軍右營練兵事務所至之處紀律嚴明宵小斂跡光緒十三年十八年兩次軍政以才具優長練兵有法均列正薦卓異漳郡賭風熾甚文武署均收陋規游擊署尤鉅賭臺即設署外桂棠履任首禁絕之自束髮從軍以及服官閩省四十餘年未嘗

上海縣志

卷十五

四十九

一日耽安逸年六十一以前在軍營服勞受傷時患頭眩遂解組歸
宣統二年卒

趙雲秀洋涇鎮裘家木橋人有勇力嘗設磨坊見牯牛相鬪兩手執其角而分之其鬪立解坊中大磨轉動綦重須用牛挽雲秀以一手推之數十轉不憊也會有米船夥某聞其名約與比武曰我能負米七袋即頭頂一袋肩負二袋手挾二袋膝置二袋如能勝始甘服雲秀試之亦能負七袋以好勝心強命人再加一袋銜於口雖一時制勝竟以是致傷得咯血疾尋卒年四十五孫本善以字行篤行好學二十三年畢業於上海聖約翰大學得學士位迭任淮揚各地中西文教授著有實用英文法等書英美煙公司聘爲內地推銷主任派駐洛陽旋又令往山西調查各分銷處賬目時土匪橫行本善已有戒

心乃請公司轉請官廳派兵護送本善跨馬前行護兵隨之馬忽疾馳遠離兵所適盜匪攔路將肆绑架護兵聞警至匪遂散竄本善於驚慌中奔避山奧尋獲時已面無人色蓋爲神經受震血液變毒遂遍身現青黯色急送附近醫院就診卒不能救年祇三十四

